

**FEDERALNO MINISTARSTVO RADA I SOCIJALNE POLITIKE
EKONOMSKO- SOCIJALNO VIJEĆE ZA TERITORIJU FEDERACIJE
BOSNE I HERCEGOVINE**

Broj: 03-34/19-1579/12
Sarajevo, 19.06.2012.godine

Z A P I S N I K

sa 88-12. sjednice Ekonomsko-socijalnog vijeća za teritoriju Federacije Bosne i Hercegovine, održane dana 19.06.2012. godine u 16.00 sati.

Sjednicom predsjedava gospodin Edhem Biber, predsjednik Ekonomsko-socijalnog vijeća.

Sjednici prisustvovali:

Nermin Nikšić, premijer Vlade Federacije BiH, Ante Krajina, federalni ministar financija, Vjekoslav Čamber, federalni ministar rada i socijalne politike, Erdal Trhulj, federalni ministar energije, rudarstva i industrije, Ismet Bajramović, predsjednik Saveza samostalnih sindikata BiH, Salih Kruščica, predsjednik Samostalnih sindikata državnih službenika i namještenika u organima državne službe, sudskoj vlasti i javnim ustanovama u FBiH, Rifat Mahmutović, predsjednik Sindikata komunalne privrede, Omer Sikira, predsjednik Samostalnog sindikata elektroenergetskih radnika BiH, Šaban Kadirić, predsjednik Sindikata građevinarstva i IGM BiH, Safudin Čengić, Mladen Pandurević, Seid Kapetanović, Predrag Čović, Edin Ibrahimpašić i Tomislav Slišković ispred Udruženja poslodavaca Federacije BiH.

Sjednici nisu prisustvovali:

Jerko Ivanković-Lijanović, federalni ministar poljoprivrede, vodoprivrede i šumarstva, Zukan Helez, federalni ministar za pitanje boraca i invalida odbrambeno-oslobodilačkog rata, Enver Bijedić, federalni ministar prometa i komunikacija, Selim Babić, ispred Udruženja poslodavaca Federacije BiH, Avad Bahto i Selvedin Šatorović koji su opravdano odsutni.

Osim članova Ekonomsko-socijalnog vijeća sjednici su prisustvovali: Midhat Arifović, direktor Porezne uprave Federacije BiH-Središnji ured, Zorica Kazić iz SSSBiH, Džana Kadribegović i Ernevaza Hrustanović iz Federalnog ministarstva rada i socijalne politike.

DNEVNI RED

1. Usvajanje zapisnika se 87-11. sjednice ESV-a;
2. Razmatranje Nacrta zakona o radu;
3. Informacija o implementaciji Zakona o fiskalnim sistemima;
4. Informacija o naplati direktnih poreza u Federaciji BiH;
5. Razno.

Predloženi dnevni red jednoglasno je usvojen.

Ad.1

Zapisnik sa 87-11 sjednice ESV-a usvojen bez primjedbi.

Ad.2

Vjekoslav Čamber, federalni ministar rada i socijalne politike je upoznao socijalne partnere o održanoj javnoj raspravi o Nacrtu zakona o radu i istakao slijedeće:

Javna rasprava je provedena u skladu sa zaključcima oba Doma Parlamenta Federacije Bosne i Hercegovine i ista je trajala 60 dana. Rasprava je obavljena u svim kantonima, a završna rasprava je održana 23.marta 2012. godine u Sarajevu na koju su bili pozvani predstavnici odbora oba Doma Parlamenta Federacije BiH, predstavnici sindikata, udruženja poslodavaca, privrednih komora, privrednih društava, javnih ustanova, nevladinog sektora, inspekcijskih organa, pa se može zaključiti da je osigurala učešće velikog broja zainteresiranih pravnih i fizičkih lica.

Nacrt zakona bio je dostupan i na Web stranicu ministarstva, pa je nakon provedene sveobuhvatne javne rasprave na Nacrt upućen veliki broj primjedbi, prijedloga i sugestija, koje su činile preko 400 stranica pisanog materijala, odnosno date su primjedbe na 120 članova Nacrta od ukupno 181 člana koliko Nacrt sadrži. Primjedbe, sugestije i prijedlozi su sistematizirani i razvrstani na generalne i pojedinačne, a svi koje su se odnosile na jasniju i precizniju formulaciju pojedinih članova su prihvaćeni.

Predstavnici Poslodavaca smatraju da tekst Nacrta predstavlja određeni napredak, ali s obzirom na članove Nacrta koji uvode nova opterećenja za poslodavce, a koja se odnose na plaćanje otpremnine, ljekarskih pregleda, noćnog rada, godišnjeg odmora, plaćenog odsustva, bolovanja za trudnice i sl, potrebno je napraviti dodatne konsultacije i usaglašavanja sa predstavnicima Sindikata i Vlade. Ujedno su istakli i potrebu za usaglašavanjem razlika oko reprezentativnosti Poslodavaca i Sindikata.

Predstavnici Sindikata smatraju da u Nacrtu zakona o radu treba da postoji: jasna definicija poslodavca, rješenje za problem vakuuma koji nastaje prestankom važenja kolektivnih ugovora do donošenja novih, utvrđena obaveza poslodavca da u slučaju otkaza ugovora o radu radniku isplati sva potraživanja, posebno obrađeno pitanje kolektivnih ugovora i na koga se odnose, te predviđen jak inspekcijski nadzor.

Predstavnici Vlade i Sindikata složili su se s prijedlogom za zajedničko rješavanje primjedbi Nacrta.

Ekonomsko-socijalno vijeće je zaključilo da se socijalni partneri sastanu 25.06.2012. godine u prostorijama Federalnog ministarstva rada i socijalne politike i usaglase neusaglašene stavove kako bi se Nacrt Zakona o radu što hitnije uputio prema Vladi FBiH radi utvrđivanja Prijedloga i upućivanja u parlamentarnu proceduru.

Ad.3

Federalni ministar finansija Ante Krajina informirao je Vijeće da je prema podacima Poreske uprave FBiH, zaključno sa 3. aprilom 2012. godine, fiskalizirano 57.410 obveznika fiskalizacije, s tim da fiskalizacija nije završen proces, s obzirom na to da ovaj broj raste. Obaveza fiskalizacije potpisana je u Sporazumu sa MMF-om.

Predstavници Poslodavaca, na čiji prijedlog se raspravlja o ovoj temi, izrazili su nezadovoljstvo ovom informacijom jer ona ne daje podatke o tome koliko je novca utrošeno na nabavku opreme i njeno održavanje i koji su efekti fiskalizacije, te šta treba mijenjati da bi se dobili bolji podaci. Smatraju da svakodnevno treba raditi na utvrđivanje stvarnih efekata fiskalizacije, poboljšanju stanja kroz marketinško predstavljanje projekta radi educiranja potrošača o njegovom značaju, kao i prepoznavanju nastalih problema kako bi se odlučilo o sljedećim koracima.

Direktor Porezne uprave FBiH Mithat Arifović informirao je Vijeće da je administriranje procesa fiskalizacije bio izuzetno veliki trošak, ali da se u njega ušlo bez odgovarajuće tehničke pripreme i informatičke podrške, te da je trenutni broj izvršilaca za njeno uspješno provođenje nedovoljan. Međutim, prednosti fiskalnih uređaja značajni su zbog mogućnost praćanja memorisanih podataka, evidentiranja problema i izvještavanja.

Federalni Premijer se složio sa primjedbom da treba napraviti presjek i analizu dosadašnjeg rada, ali je istakao da se proces fiskalizacije, uz pojačanu kontrolu inspekcije, treba završiti, a potom sagledati efekte koji bi definisali dalje postupke.

Predstavnici Sindikata smatraju da treba naglasiti i činjenicu da nema dovoljno izvršilaca za uspješno provođenje ovog procesa.

Ekonomsko-socijalno vijeće smatra da projekat fiskalizacije treba organizirano dovesti do kraja i poziva socijalne partnere da iznesu svoje ideje za uspješno prevazilaženje nastalih problema.

Ad.4

Direktor Porezne uprave FBiH Midhat Arifović prezentirao je Informaciju o naplati direktnih poreza za period januar-maj 2012. godine koju je zatražila delegacija Poslodavaca. Prema Informaciji, porez na dobit naplaćen u iznosu od 79.309.725 KM, što je za 27,07 % ili za 16,89 miliona KM više nego u istom periodu prošle godine.

Porezna uprava Federacije BiH, također je od januara do maja 2012. godine, prikupila direktnih poreza u iznosu od 380.330.564 KM, što je za 9,39 % ili za 32,66 miliona KM više od naplaćenih u istom periodu prošle godine. I porez na dobit banaka i drugih finansijskih institucija bilježi rast prihoda za 69,74 % ili za 12,51 milion KM, a porez na dobit preduzeća, koji pripada kantonalnom i općinskom budžetu, veći je za 9,85 % ili za 4,38 milion KM.

U diskusiji koja je slijedila socijalni partneri iznijeli su niz nepravilnosti vezanih za plaćanje, odnosno neplaćanje poreza i doprinosa od strane i državnih i privatnih subjekata.

Istaknuti su problemi nedostatka sredstava u sistemu PIO/MIO, povezivanju radnog staža, nejednaka mjerila u radu inspektora Porezne uprave, te potrebu da socijalni partneri hitno počnu raditi na Općem kolektivnom ugovoru ili donošenju novog Općeg kolektivnog ugovora.

Ekonomsko-socijalno vijeće traži od nadležnih državnih institucija da preduzmu sve potrebne mjere, kako bi se obaveze privrednih subjekata, kada su u pitanju porezi i doprinosi, još uspješnije i efikasnije naplatili.

Ekonomsko-socijalno vijeće traži da Porezna uprava Federacije BiH javno objavi podatke o pravnim subjektima, koji ne izmiruju svoje zakonske obaveze, kada je u pitanju redovnost plaćanja poreza i doprinosa.

Ad.5

Predsjednik ESV-a upoznao je prisutne o poslanim dopisima kojima su se tražile informacije o realiziranim zaključcima ESV-a, a na koje Stručna služba ESV-a nije dobila sve odgovore. Socijalni partneri su se suglasili da im se informacije pismeno proslijede radi pripreme i eventualne rasprave.

Federalni ministar financija direktno je odgovorio na traženu informaciju o potrebi za nastavak ili novi aranžman sa MMF-om. Naveo je da je MMF napravio analizu trenutnog stanja i trendova u BiH. Izvještaj Federacije BiH, koji je napravljen je i narativno i sa brojčanim pokazateljima, je prihvaćen, dok Republika Srpska treba napraviti dopune svoga izvještaja. Na sutrašnjoj sjednici Vlade FBiH zahtijev bi se trebao konačno definirati i uputiti MMF-u. Do sada nije definirano koliko je sredstava potrebno, ali nije postavljen nikakav limit.

Zadužuje se Stručna služba da od Uprave za indirektno oporezivanje traži podatak koliko je povećan broj PDV obveznika u Federaciji BiH nakon uvođenja fiskalizacije sa 31.12.2012. godine, i prvih pet mjeseci 2012. godine.

Sjednica Ekonomsko-socijalnog vijeća zaključena je u 19:15 sati.

Kolegij ESV-a će se održati krajem ovog mjeseca, kada će biti utvrđen dnevni red i datum održavanja naredne sjednice ESV-a.

Zapisnik pripremila
Snježana Kapić

Predsjednik
Ekonomsko-socijalnog vijeća
Edhem Biber